

25. յղեաց գիր սիրոյ եւ յարգութեան առ սրբազան պապն կղեմէս մետասաներորդ ի դիմաց իւրոց եւ ի դիմաց համօրէն վարդապետաց եւ բովանդակ հօտին իւրոյ. յորում ընդունելով զհռովմայ հայրապետն լինել փոխանորդ քրիստոսի եւ յաջորդ պետրոսի վիմի՝ անուանէ զնա երիցս երջանիկ տիեզերական հայրապետ, եւ պետական գլուխ. գերիշխանական մեծութիւն, եւ գերագոյն նախագահութիւն, հայր հասարակաց քրիստոնէից, եւ անշջանելի ջահ կաթողիկէ եւ առաքելական եկեղեցւոյ: Եւ առաջի եղեալ զսէր իւր եւ զիւրայոցն առ սրբազան գահն Հռովմայ, խնդրէ՝ զի ըստ հայրախնամ գլխոյն արժանի արասցէ առաքել զփոխարձ պատասխանի յաթոռն սրբոյ Էջմիածնի. եւ մեք ասէ ընկալցուք զթուղթ ձեր իբրեւ զաստուածատուր պատգամս մովսեսի:

“Այս նամակ յորժամ եհաս ի հռովմ, անդ գտաւ յակօբ վիլոդ լատին կրօնաւոր ի կարգէ յիսուսեանց. եւ զի սա ըստ վկայելոյ իւրոյ զամս քսան եւ հինգ շրջեալ էր յաշխարհին հայոց եւ պարսից, եւ ունէր փոքր մի տեղեկութիւն հայկական լեզուի, թարգմանեաց ի լատին զթուղթ կաթողիկոսին՝ թէպէտ եւ ոչ հարազատ իմացուածով: Եւ սրբազան պապն կղեմէս գրեաց ի յաջորդ ամի ի մարտի 15, պատասխանի սիրով առ կաթողիկոսն. եւ ընդ թղթոյն առաքեաց զնամակ դաւանութեան՝ ստորագրել այնմ: Ուրանօր հարեւանցիկ դիտել արժան է, զի զազար ջահկեցին ասէ ի գիրսն իւր. յերես 606. թէ աղէքսանդր կաթողիկոս գրեալ իցէ “թուղթ ընդդիմութեան առ կղեմենդոս փափն հռովմայ:” Եւ սակայն յակօբ վիլոդ՝ որ թարգմանեաց զայն թուղթ, յայտնի վկայէ՝ թէ այն էր ուղղափառական եւ սիրալական, եւ ոչ դիմադրական. զնոյն վկայէ եւ տիրացու մաղաքիա ժամանակակից, թէ “գրեաց թուղթս սիրոյ առ կղեմէնդ պապն:”